

ԿԱՐԳ

ՍԱՀՄԱՆԱՅԻՆ ՇԵՐՏՈՒՄ ԵՎ ՍԱՀՄԱՆԱՅԻՆ ԳԵՏԻ ԱՓԵՐԻՆ
ԳՏՆՎՈՂ ՀԱՆՔԵՐԵՎԱԿՈՒՄՆԵՐՈՒՄ ԵՎ ՀԱՆՔԱՎԱՅՐԵՐՈՒՄ
ԸՆԴԵՐՔՕԳՏԱԳՈՐԾՈՒՄ ԻՐԱԿԱՆԱՑՆԵԼՈՒ ՎԵՐԱԲԵՐՅԱԼ ԱԶԳԱՅԻՆ
ԱՆՎՏԱՆԳՈՒԹՅԱՆ, ԱՐՏԱՔԻՆ ԳՈՐԾԵՐԻ ԵՎ ՊԱՇՏՊԱՆՈՒԹՅԱՆ
ԲՆԱԳԱՎԱՌՆԵՐԻ, ԻՍԿ ՄԱՔՍԱՅԻՆ ՀՄԿՈՂՈՒԹՅԱՆ ԳՈՏՈՒ
ԿԱՐԳԱՎԻՃԱԿ ՈՒՆԵՑՈՂ ՏԱՐԱԾՔՆԵՐՈՒՄ՝ ՆԱԵՎ ՄԱՔՍԱՅԻՆ
ԲՆԱԳԱՎԱՌԻ ՊԵՏԱԿԱՆ ԼԻԱԶՈՐՎԱԾ ՄԱՐՄԻՆՆԵՐԻ՝ ԻՐԵՆՑ
ԻՐԱՎԱՍՈՒԹՅՈՒՆՆԵՐԻ ՇՐՋԱՆԱԿՆԵՐՈՒՄ ՀԱՄԱՁԱՅՆՈՒԹՅՈՒՆՆԵՐԻ
ՏՐԱՄԱԴՐՄԱՆ

1. Սույն հավելվածով սահմանվում է սահմանային շերտում և սահմանային գետի ափերին գտնվող հանքերնակումներում և հանքավայրերում ընդերքօգտագործում (այսուհետ՝ ընդերքօգտագործում) իրականացնելու վերաբերյալ ազգային անվտանգության, արտաքին գործերի և պաշտպանության բնագավառների, իսկ մաքսային հսկողության գոտու կարգավիճակ ունեցող տարածքներում՝ նաև մաքսային բնագավառի պետական լիազորված մարմինների՝ իրենց իրավասությունների շրջանակներում համաձայնությունների տրամադրման կարգը:

2. Ընդերքօգտագործումը թույլատրվում է բացառապես սույն հավելվածով սահմանված կարգով ստացված համապատասխան համաձայնությունների առկայության դեպքում:

3. Համաձայնությունները տրամադրվում են գրավոր՝ ազգային անվտանգության, արտաքին գործերի և պաշտպանության բնագավառների պետական լիազորված մարմինների, իսկ մաքսային հսկողության գոտու կարգավիճակ ունեցող տարածքներում՝ նաև մաքսային բնագավառի պետական լիազորված մարմնի կողմից (այսուհետ՝ լիազոր մարմին) իրենց իրավասությունների շրջանակներում:

4. Համաձայնություն հայցելու նպատակով իրավաբանական անձը (այդ թվում՝ օտարերկրյա պետության առևտրային կազմակերպությունը, այսուհետ՝ դիմումատու), որը ցանկանում է ձեռք բերել ընդերքօգտագործման իրավունք օգտակար հանածոների երկրաբանական ուսումնասիրության կամ օգտակար հանածոյի արդյունահանման աշխատանքներ իրականացնելու նպատակով, համապատասխան լիազոր մարմին է ներկայացնում գրավոր դիմում, որին կցվում են՝

1) դիմումատուի պետական գրանցման համարը, դիմումատուի գործադիր մարմնի ղեկավարի կամ դիմումատուի կողմից լիազորված անձի հեռախոսահամարը.

2) երկրաբանական ուսումնասիրության ենթակա օգտակար հանածոն (հանածոները) կամ ընդերքաբանական փորձաքնության արդյունքներով հաստատված պաշարներ ունեցող օգտակար հանածոն (հանածոները).

3) նախատեսվող աշխատանքների իրականացման համար պահանջվող ժամկետը.

4) օգտակար հանածոյի երևակման կամ հանքավայրի տեղադիրքի մասին տեղեկատվությունը՝ ՎԻ ՋԻ ԷՍ-84 (WGS-84) (ARMREF 02) ազգային գեոդեզիական և ՄԿ-42 (CK-42) կոորդինատային համակարգերով.

5) օգտակար հանածոյի երևակման կամ հանքավայրի տեղադրության հատակագիծը՝ նշելով սահմանային շերտի, սահմանային գետի, իսկ մաքսային հսկողության գոտու կարգավիճակ ունեցող տարածքներում՝ նաև մաքսային հսկողության գոտու նկատմամբ դիրքը.

6) նախատեսվող ընդերքօգտագործման աշխատանքների համառոտ նկարագրությունը, մասնավորապես՝ նախատեսվող երկրաբանական ուսումնասիրությունների կամ արդյունահանման աշխատանքների ծավալները.

7) դիմումը ներկայացնելու օրվան նախորդող առավելագույնը 10 օրվա վաղեմությամբ կատարված գեոդեզիական չափագրումներով հատակագիծը, որը կարտացոլի նախատեսվող գործունեության փաստացի տեղադիրքը բնության մեջ և հեռավորությունը գետի հունից:

5. Լիազոր մարմինները, ոչ ուշ, քան դիմումի ստացման օրվանից երեսուն աշխատանքային օրվա ընթացքում ուսումնասիրում են դրանք և ընդունում են գրավոր վարչական ակտ՝ համաձայնությունը տրամադրելու կամ համաձայնություն տրամադրելը մերժելու վերաբերյալ: Համապատասխան վարչական ակտը կայացնելուց հետո եռօրյա ժամկետում փոստային կամ էլեկտրոնային եղանակով ծանուցում են դիմումատուին: Համաձայնություն տրամադրելը մերժելու դեպքում լիազոր մարմինները ներկայացնում են մերժման հիմնավորումները՝ բացառությամբ սույն կարգի 7-րդ կետով նախատեսված դեպքի:

6. Համաձայնության տրամադրումը ենթակա է մերժման, եթե նախատեսվող ընդերքօգտագործման աշխատանքների իրականացումը կարող է վտանգել կամ խոչընդոտել.

1) ազգային անվտանգության բնագավառում՝ ազգային անվտանգության, սահմանային անվտանգության կամ պետական սահմանի պահպանության ապահովմանը.

2) պաշտպանության բնագավառում՝ պաշտպանական նշանակության օբյեկտների և ենթակառուցվածքների բնականոն գործունեությանը.

3) արտաքին գործերի բնագավառում՝ Հայաստանի Հանրապետության միջազգային պարտավորությունների կատարմանը, սահմանակից պետությունների հետ հարաբերություններին կամ միջազգային համագործակցության շահերի ապահովմանը.

4) մաքսային հսկողության գոտու կարգավիճակ ունեցող տարածքներում՝ մաքսային հսկողության իրականացմանը:

7. Ազգային անվտանգության բնագավառի պետական լիազորված մարմինը համաձայնություն տրամադրելը մերժելու դեպքում դիմումատուին չի ներկայացնում մերժման հիմնավորումները, եթե մերժման հիմքերի հրապարակումը կարող է վտանգել պետական և ծառայողական գաղտնիք հանդիսացող տեղեկությունների պահպանությունը:

8. Ոչ լրակազմ փաթեթ ներկայացնելու կամ ներկայացված փաստաթղթերում այնպիսի թերությունների, վրիպումների, անճշտությունների կամ այլ բացթողումների առկայության դեպքում, որոնք խոչընդոտում են դիմումի քննարկմանը, լիազոր

մարմինը ոչ ուշ, քան դիմումի ստացման օրվանից հինգ աշխատանքային օրվա ընթացքում՝ փոստային կամ էլեկտրոնային ծանուցմամբ վերադարձնում է փաթեթը լրանշակման՝ հստակ նշելով հայտնաբերված թերությունները:

9. Վերադարձված փաթեթը ստանալու օրվանից ոչ ուշ, քան տասն աշխատանքային օրվա ընթացքում դիմումատուն պարտավոր է վերացնել նշված թերությունները և լրանշակված փաթեթը ներկայացնել լիազոր մարմին, այս դեպքում սույն կարգի 5-րդ կետով սահմանված ժամկետը կասեցվում է մինչև դիմումատուի կողմից լրանշակված փաթեթի ներկայացման օրը, բայց ոչ ավելի, քան տասն աշխատանքային օրով:

10. Եթե սահմանված ժամկետում թերությունները չեն վերացվում, ապա լիազոր մարմինը մերժում է դիմումը և այդ մասին եռօրյա ժամկետում փոստային կամ էլեկտրոնային եղանակով ծանուցում է դիմումատուին:

11. Տրված համաձայնությունները դիմումատուն ներկայացնում է ընդերքի օգտագործման և պահպանության բնագավառում լիազոր մարմին՝ ընդերքօգտագործման իրավունք հայցելու դիմումին կից՝ համաձայնության տրամադրման օրվանից հաշված վեց ամսվա ընթացքում:

12. Սույն հավելվածի 11-րդ կետով սահմանված վեցամսյա ժամկետը լրանալուց հետո ներկայացված համաձայնությունը չի կարող հիմք հանդիսանալ ընդերքօգտագործման իրավունք տրամադրելու համար: Այդ դեպքում դիմումատուն պարտավոր է սույն հավելվածով սահմանված կարգով կրկին հայցել և ներկայացնել նոր համաձայնություն՝ ընդերքօգտագործման իրավունք ստանալու նպատակով:

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՎԱՐՉԱՊԵՏԻ ԱՇԽԱՏԱԿԱԶՄԻ
ՂԵԿԱՎԱՐԻ ՏԵՂԱԿԱԼ

Ա. ԽԱՉԱՏՐՅԱՆ